

၁ ယောဟန်

ယောဟန်ရဲ့ ပထမပေးစာ

နိဒါန်း

ယောဟန်ရဲ့ ပထမပေးစာ ဟို့ ခရစ်တော် မွီးဘီးန ၅၀ န ၁၀၀ ခုနှစ်ကြားမှာ တမန်တော် ယောဟန်ဟု ရေးဟွားဟွယ်။ ယောဟန်ဟာ သူ့ကိုယ်သူ စာရေးသူဖြစ် ဖော်ပြဟွားမျိုးဘဲ သူဟာ ယေရှုရဲ့ ရှင်ပုလန်ထမြောက်ရှင်းန သတ်ရှင်ရှင်းဟို့ ဗြင်ရဟူ သတ်သေ တယော့-က် ဖြစ်ဟွယ် ဆိုဘီးလည်း ဖော်ပြဟွားဟွယ် (၁.၁-၃)။ “ယောဟန်ရဲ့ ပထမပေးစာ” ရဲ့ စာရေးသားပေါင်စံဟာ “ယောဟန်ရေးဟွားဟူ ခရစ်တော်ရဲ့ ဒန်းကောန်း” ရဲ့ စာရေးသားပေါင်စံန ရရာတိုင်း ဆင်တူဟွယ်။ ယောဟန်ရေးဟွားဟူ ခရစ်တော်ရဲ့ ဒန်းကောန်းန ယောဟန်ရဲ့ ပထမ၊ ဒုတိယ၊ တတိယ ပေးစာလေဟို့ ဖောက်မြို့မှာ နေနေဒူးမှာ ယောဟန်ရေးဟွားဟွယ် ဆိုဘီး လတ်ခံဟွားဂေဟွယ်။

သင်းတော်ဟို့ “နောစတီ” ဆိုဘီး ခေါ်ဟူ လူအောက်စုဟု ရရာတိုင်း ဒေါက်ခပေးနေဟူ ခီမှာ ယောဟန်ဟာ အယ်ပေးစာဟို့ ခရစ်ယာန်လေနားဟို့ ရေးဟွားရှင်းဖြစ်ဟွယ်။ အယ်လူလေဟု ယေရှုဟာ ဘုရားသခင် ဖြစ်ဟွယ် ဆိုဘီး ယောင်ကြည်ဘေမဲ့လည်း မှလေဂီးထတ်မှာ နေဒူးဟု လူရဲ့

သွီးသားခန္ဓာန မူဟု ဆိုဘီးလည်း ယောင်ကြည်ဂေဟယ်။
 အယ်ကြောင်းလေကြောန့် ယောဟန်ဟာ ယေရှုရဲ့ သတ်
 ရှင်ရှင်းဟို့ ပြင်ဟူသတ်သေ တယော့-က် ဖြစ်ဟူကြောင်း
 န ယေရှုဟို့ သူရဲ့ လတ်လေန ထိတို့ဟူးကြောင်းဟို့လည်း
 ရေးဟူးလေဟယ် (၁.၁-၃)။ အယ်ပေးစာရဲ့ ရည်ရွယ်ချစ်
 ဟာ ဝန်းသာမူဟို့ ပုလဲဝ ခံစားနိုင်ဂေဟို့တွပ် (၁.၄)၊ ယောင်
 ကြည်သူလေဟို့ ပြစ်ဟုနေ တားဆီးဟို့တွပ် (၂.၁)၊ ယောင်
 ကြည်သူလေဟို့ မှားယွင်းဟူ သွန်သန်ရှင်းလေဟုနေ ကာ
 ကွယ်ဟို့တွပ်န (၂.၂၆) ယောင်ကြည်သူလေဟို့ ကယ်တန်
 ခံရပီးဘီ ဆိုဇာဟို့ စီခလဟို့တွပ် ဖြစ်ဟယ် (၅.၁၃)။

ကြောင်းရာ ကျဉ်းချောက်

- ၁။ ယောဟန်ဟာ သူရဲ့ ပေးစာဟို့ နိဒါန်းပျိုးဟူးဘီး
 အယ်ပေးစာတွပ် ရည်ရွယ်ချစ်တခုဟို့ ပေးဟူးဟူ
 ကြောင်း (၁.၁-၄)
- ၂။ ဘုရားသခင်ဟာ လန်းတော်ဖြစ်ဘီး ယေရှုသတ်ရှင်
 ဟူကြောန့် နို့လေလည်း သတ်ရှင်ဟယ် ဆိုဘီး ရှင်း
 ပြဟူးဟူကြောင်း (၁.၅-၃.၁၀)
- ၃။ ရှင်းရှင်းချစ်ဟို့တွပ် ကျွန်တော်ဟူးလေဟို့ ပုလန်ဒိ
 ပေးဟူးဟူကြောင်း (၃.၁၁-၅.၁၂)
- ၄။ သူရဲ့ ပေးစာဟို့ နိဂေါင်းချောက်ဟူးဟူကြောင်း
 (၅.၁၃-၂၁)

သတ်ရှင်ဟူ စကားတော်

¹ သတ်ရှင်ဟူ စကားတော်ကြောင်းဟို့ နို့လေဟု စာရေးလိုက်ဟယ်။ အယ်စကားတော်ဟာ စစဒူးဟု ရှိနေဟယ်။ အယ်စကားတော်ဟို့ နို့လေဟာ ကြားရဂေဟယ်။ နို့လေကိုယ်တိုင်ဟု မျစ်စိန် ဖြင်ရဂေဟယ်။ နို့လေရဲ့လတ်နစမ်းသပ်ဘီး ကေ့ရှုဂေဟယ်။

² အယ်သတ်ဟာ ပေါ်လာဟူ ခီမာ နို့လေမြင်ရဂေဟယ်။ အယ်ကြောန် အယ်ကြောန်းဟို့ နို့လေဟု ဟောပြောဂေဟယ်။ ဖန တူးဒုရှိနေဟူ သတ်ဟာ နို့လေမာ ထန်ရှားဟူကြောန် နို့လေဟာ အယ်ထာဝရသတ်ကြောန်းဟို့ နန်းနို့ဟို့ သတ်သေခံဘီး ကြေညာဂေဟယ်။

³ နို့လေဟာ ဖနရော၊ သားတော် ယေရှုခရစ်နရော၊ မိတ်သဟာယဖွဲ့ရဂေဟူကြောန် နန်းနို့ဟုလည်း နို့လေနတူးဒု အယ်မိတ်သဟာယမာ ပါဝမ်ခွမ် ရဂေဟို့တွပ် နို့လေ ဗြင်ကြားရဟူ ဇာလေဟို့ နန်းနို့ဟို့ ဖော်ပြဟယ်။

⁴ နို့လေရဲ့* ဝန်းသာရှင်းဟို့ ပုလဲဝ ခံစားနိုင်ဂေဟို့တွပ် အယ်ကြောန်းရာလေဟို့ စာရေးလိုက်ဟယ်။

ဘုရားသခင်ဟာ လန်းရောန်ဖြစ်ဟူကြောန်း

⁵ ဘုရားသခင်ဟာ လန်းရောန်ဖြစ်ဟယ်။ ကိုယ်တော်မာ မှော်နလောင်းဝ မှေ့ဟု ဆိုဘီး တရားစကားဟို့ နို့လေဟာ ကိုယ်တော်ရဲ့ သားတော်နားဟုနေ ကြားရသိရဟူကြောန် နန်းနို့ဟို့ ကြေညာဟယ်။

1:1 ၁.၁ ယော ၁.၁ 1:2 ၁.၂ ယော ၁.၁၄ * 1:4 ၁.၄ နို့လေရဲ့၊ တချို့ မူရင်းလတ်ရေးမူလေမာ နန်းနို့ရဲ့၊ ဆိုဘီး ပါဟယ်။

6 အယ်ကြောန့် နို့လေဟာ ကိုယ်တော်န မိတ်သဟာယဖွဲ့
ရဲဂေဟယ် ဆိုဘီး မှောန်ထဲမာ ကျင်လည်နေဂေဟာ
နို့လေဟာ လီညာပြောဆိုဟူ သူဖြစ်ဘီး သမ္မာတရားဟို့
ကျင့်နေဂေဟာ မူဟူ။

7 ကိုယ်တော်ဟာ လန်းရောန်ထဲမာ ရှိနေမျိုးဘဲ နို့
လေဟာ လန်းရောန်ထဲမာ ကျင်လည်ဂေဟူ ကြောန့်
ရှင်းရှင်း ယော့-က်နယော့-က် မိတ်သဟာယ ဖွဲ့ဂေဟယ်။
ဘုရားသခင်ရဲ့ သားတော် သခင်ယေရှုရဲ့ သွီးတော်ဟာ နို့
လေရဲ့ ပြစ်ဂူလောင်းဟုနေ စင်ကြယ်စေဟယ်။

8 နို့လေဟာ ပြစ်သားလေ မူဟု ဆိုဘီး ပြောမယ် ဆိုဟာ
နို့လေဟာ ကိုယ့်ကိုယ်ကိုယ် လှည့်ဇားဂေဟယ်။ နို့လေမာ
သမ္မာတရားလည်း မေ့ဟူ။

9 ကိုယ်ပြစ်လေဟို့ ဝန်ခံလ တောင်းဗန်မယ် ဆိုဟာ
ဘုရားသခင်ဟာ ဒီသစ်စာတည်ဘီး ပြောန့်မတ်ဟူရှင် ဖြ
စ်ဟူကြောန့် နို့လေရဲ့ ပြစ်လေဟို့ လွှတ်ပေးဘီး နို့လေဟို့
ဒုစရိုက်ညစ်ကြေး ဂူလောင်းဟုနေ စင်ကြယ်စေဟယ်။

10 နို့လေဟာ ပြစ်ကျူးလွန်ဟူလူလေ မူဟု ဆိုဘီး ပြော
မယ် ဆိုဟာ ဘုရားသခင်ဟို့ မုသားပြစ်တန်ဂေဟယ်။
ဘုရားစကားဟုလည်း နို့လေမာ မေ့ဟူ။

2

နို့လေဟို့ ကူညီဟူခရစ်တော်

၁ ငါ့သားမီးလေ၊ နန်းနို့ဟို့ ပြစ်လောက်စေရှင်ဘဲကြော
န့် အယ်စာဟို့ ငါရေးပေးလိုက်ဟယ်။ ယော့-က်ယော့-က်
ဟာ ပြစ်လောက်မိမယ် ဆိုဟာ ဖနားမာ နို့လေတွပ် ကူညီ
ဖြေရှင်းပေးဟူ ဖြောန်မတ်ဟူ သခင်ယေရှုခရစ်တော် ရှိနေ
ဟယ်။

၂ ကိုယ်တော်ဟာ နို့လေပြစ်မျှ မကဘဲန ကမ္ဘာသူ ကမ္ဘာ
သား ဂူလောင်းရဲ့ ပြစ်ဖြေဇာကြောန်း ပူဇော်ဆစ်ကပ်ဟား
ဟူ သခင်ဖြစ်တော်မူဟယ်။

၃ နို့လေဟာ ဘုရားသခင်ရဲ့ ပညတ်တော်လေဟို့ စော
န့်ထီးနိုင်မှဘဲ ကိုယ်တော်ဟို့ သိကျွမ်းဟူ လူလေဖြစ်ဂေ
ကြောန်းဟို့ သေးသေချားချာဟား သိနိုင်ဟယ်။

၄ ကိုယ်တော်ဟို့ ငါသိဟယ် ဆိုဘီး ပညတ်တော်လေဟို့
စောန့်ဘဲဟူလူဟာ လူလီလူညာဖြစ်ဘီး သူ့မာလည်း သမ္မာ
တရား မှေ့ဟူ။

၅ ကိုယ်တော်ရဲ့ စကားတော်ဟို့ နားထောန်လူဟာ တက
ယ်ဘဲ ဘုရားသခင်ရဲ့ ရှစ်ရှင်းမြစ်တာဟာ အယ်သူမာ မှန်
တိုင်းဘဲ ပုလဲဇောင်ဟယ်။ အယ်မျိုးမှ ကျွန်တော်လေဟာ
ဘုရားသခင်န တလောင်းတဝဒဲ ဖြစ်ဟူကြောန်းဟို့ သေး
သေချားချာဟား သိဂေဟယ်။

၆ ဘုရားသခင်န တလောင်းတဝဒဲ ဖြစ်ဟူကြောန်းဟို့
သေးသေချားချာ သိဟူလူဟာ သခင်ယေရှု ကျင့်မျိုး
လိုက်ကျင့်ဟူလူ ဖြစ်ဟယ်။

ပညတ်တော်သစ်ကြောန်း

၇ ရှစ်ရဟူသလေ၊ နန်းနို့နားဟို့ ငါရေးလိုက်ဟူစလေ
ဟာ ပညတ်တော်သစ် မူဟူ။ စစဒူးဟု နန်းနို့ရဟားဟူ
ပညတ်ဟောန်းဘဲ ဖြစ်ဟယ်။ အယ်ပညတ်တော်ဟောန်း
ဟာ နန်းနို့ကြားရဟူ တရားတော်ဘဲ ဖြစ်ဟယ်။

၈ အယ်ဘေမဲ့ ခုနန်းနို့ဟို့ ငါရေးပေးလိုက်ဟူ ပညတ်
တော်ဟာ သစ်ဖြစ်ဟယ်။ အယ်မျိုး မှန်ဖြစ်ဟူကြောင်း
ခရစ်တော်နရော၊ နန်းနို့နရော၊ သစ်ဖြစ်ဟယ်။ ဖြားဖြစ်
ကြောနဲ့နူးဆိုဟာ မှော်ဟာရွေလျားကွယ်ပျော့-က်ဟား
ဘီး စစ်မှန်ဟူ လန်းရောန်ဟု ပေါ်လာကြောနဲ့ ဖြစ်ဟယ်။

၉ လန်းရောန်မာ ကျင်လည်ဟယ် ပြောဘီး ကိုယ့်ရဲ့ ညီ
ကို မောန်နှမဟို့ မူးနေဟူလူဟာ ခုထိမှော်မာ ကျင်လည်
နေဟူလူ ဖြစ်ဟယ်။

၁၀ ညီကို မောန်နှမဟို့ ရှစ်ဟူလူဟာ လန်းရောန်မာ ကျင်
လည်ဟူလူ ဖြစ်ဟယ်။ သူဟာ ဖယ်သူဟို့လည်း* မှားယွင်း
စေဟို့ မူဟူ။

၁၁ အယ်ဘေမဲ့ ညီကို မောန်နှမဟို့ မူးနေဟူ လူဟာ မှော်
န်မာနေဟူလူ ဖြစ်ဟယ်။ မှော်န်မာနေဟူကြောနဲ့ သူဟာ
ဖယ်နေရာဟို့ သွားဟယ် ဆိုဇာ သိဟူ။

၁၂ သားမီးလေ၊ နန်းနို့ဟာ ခရစ်တော်ရဲ့ နာမတော်ကြော
နဲ့ ပြစ်လွတ်ဟားဘီ ဆိုဇာ နန်းနို့နားဟို့ ငါရေးလိုက်ဟ
ယ်။

2:7 ၂.၇ ယော ၁၃.၃၄
အယ်မျိုးမူဘဲနေဟာ နို့လေ။

* 2:10 ၂.၁၀ ဖယ်သူဟို့လည်း၊

13 ဖခင်လေ၊ နန်းနို့လေဟာ စစဒူးဟု ရှိနေဟူသခင်ဟို သိဟူလူလေ ဖြစ်ဟူကြောင့် နန်းနို့လေနားဟို စာရေးလိုက် ဟယ်။ ပျိုလူပျိုလေ၊ နန်းနို့ဟာ မာရ်နတ်ဟို အောက်နိုင်ဟူ ကြောင့် နန်းနို့နားဟို ငါစာရေးလိုက်ဟယ်။

14 သားမီးလေ၊ နန်းနို့ဟာ ဖဟို သိဟူလူလေ ဖြစ်ဟူ ကြောင့် နန်းနို့နားဟို ငါဟာ စာရေးလိုက်ဟယ်။ နန်းနို့လေ ဟာ စစဒူးဟု ရှိနေဟူ သခင်ဟို သိဟူလူလေ ဖြစ်ဟူကြော န် နန်းနို့နားဟို ငါစာရေးလိုက်ဟယ်။ ပျိုလူပျိုလေ၊ နန်းနို့ ဟာ ခွန်အားရှိဘီး ဘုရားသခင်ရဲ့ စကားတော်ဟို နန်းနို့ လေဟာ မှီဝဲဆည်းကပ်ဘီး၊ မာရ်နတ်ဟို အောက်ဟူကြောင့် နန်းနို့နားဟို ငါစာရေးလိုက်ဟယ်။

15 နန်းနို့ဟာ လောကန လောကီမာ ရှိဇာလေဟို ရှစ်ဂေ န။ လောကဟို ရှစ်ဟူလူဟာ ဖဟို ရှစ်ဟု။

16 ပြားဖြစ်ကြောင့်နူးဆိုဟာ လောကီမာ ရှိဟူဇာလေ ဖြစ်ဟူ ကိုယ်ကာယ တတ်မတ်စွဲလန်းရှင်းလေ၊ မျစ်စိန် မြင်ဘီး လိုရှင်တတ်မတ်ရှင်းလေ၊ စည်းဇိမ်အောက်စာ ဝါကြွားရှင်းလေဟာ ဖန ဆိုင်ဟု။ လောကနဘဲ ဆိုင်ဟု ယ်။

17 လောကနတူးဒု လူလေ တတ်မတ်ဟူဇာလေဟာ ပျော့-က်ဟားလေဟယ်။ ဘုရားသခင်ရဲ့လိုတော်ဟို ဆော န်ဟူလူဟာ ထာဝရတည်ဟယ်။

ခရစ်တော်ရဲ့ ရန်သူကြောင်း

18 သားမီးလေ၊ နှော့-က်ဆောင်းကာလမာ ခရစ်တော်ရဲ့ ရန်သူ ပေါ်လာဟူကြောင်းကို နန်းနို့ ကြာရဂေဟယ်။ ခုဘဲ ခရစ်တော်ရဲ့ရန်သူ ဘောင်ဂီးပေါ်လာဟယ်။ အယ်ချစ်ကို ကေ့ဟူ ခီမာ ခုကာလဟာ နှော့-က်ဆောင်းကာလ ရှော့-က်လာကြောင်းကို နို့လေ သိဂေဟယ်။

19 အယ် လူ လေ ဟာ ဖယ် ခါ လည်း နို့ လေ န မိတ်သဟာယထဲမာ ပါဂေဘဲန နို့လေ နားဟုနေ ထွပ်ဟားဂေဟယ်။ တကယ်ကို နို့လေန ဆိုင်မယ် ဆိုဟာ နို့လေန တူးဒူ ရှိနေဂေလေ့မယ်။ သူးနို့ဟာ မှန်ဘဲ နို့လေန ဆိုင်ဘဲဇာကို ထန်ရှားကိုတွပ် သူးနို့ဟာ နို့လေနားဟုနေ ထွပ်ဟားဂေဟယ်။

20 ခရစ်တော်ဟာ နန်းနို့ထတ်ကို သန်ရှင်းဟူဝိညာဉ်တော်ကို လောင်းခလလိုက်ဟူကြောန့် နန်းနို့ ဂူလောင်းဟာ သမ္မာတရားကို သိဂေဟယ်။

21 နန်းနို့နားကို ငါစာရေးရဟူကြောင်းဟု သမ္မာတရားကို နန်းနို့ သိဂေဘဲကြောန့် မှဟု။ သမ္မာတရားကိုရော၊ မုသားစကားဟာ သမ္မာတရားန ဖယ်မျိုးလည်း ဆိုင်ဘဲဇာကို နန်းနို့ သိဂေဟူကြောန့် ဖြစ်ဟယ်။

22 အယ်ကြောန့် ဖယ်သူဟာ မုသားစကားကို ပြောနူး။ သခင်ယေရှုဟာ ခရစ်တော်မှဟု ဆိုဘီး ပြောဟူလူဟာ မုသားစကားကို ပြောဟူသူဖြစ်ဟယ်။ အယ်မျိုးလူဟာ ခရစ်တော်ရဲ့ရန်သူ ဖြစ်ဟယ်။ သူဟာ ဖန သားတော်ကို ငြင်းပယ်ဟူလူ ဖြစ်ဟယ်။

23 သားတော်ကို ငြင်းပယ်လူဟာ ဖဟို သိဟု။ သားတော်
ကို ဝန်ခံဟူလူဘဲ ဖဟို သိဟယ်။

24 အယ်ကြောန် နန်းနို့ဟာ စစဒူးဟု ကြားရဟူ တရား
တော်ကို စိန်လောင်းထဲမှာ ထီးသီးဟွားဂေ့ပါ။ အယ်မျိုး
လောက်မယ် ဆိုဟာ သားတော်နရော၊ ဖနရော၊ တလောင်း
တဝဒဲ ရှိဂေ့လေ့မယ်။

25 အယ်ဇာဟု နို့လေဟို ခရစ်တော်ကိုယ်တိုင် ဒီထား
ဟွားဟူ ထာဝရသတ်ဘဲ ဖြစ်ဟယ်။

26 နန်းနို့ဟို လမ်းမှားအောက် ကြိုးစားနေဂေ့ဟူ လူလေ
ရဲ့ ကြောန်းနပတ်သတ်ဘီး နန်းနို့နားဟို ငါစာရေးလိုက်ဟ
ယ်။

27 နန်းနို့ဟို ခရစ်တော်ဟု သူ့ရဲ့ ဝိညာဉ်တော်ဟို နန်း
နို့ထတ်ဟို လောင်းခလဟယ်။ ဝိညာဉ်တော်ဟာ နန်းနို့စိ
န့်လောင်းထဲမှာ ကိန်းဝပ်နေဟူ ကာလပတ်လောင်း နန်း
နို့ဟို တခြားဖြားဇာလည်း သွန်သန်ပေးဇာ လိုဟု။ ဖြား
ဖြစ်ကြောန်းနူးဆိုဟာ ကိုယ်တော်ရဲ့ ဝိညာဉ်တော်ဟာ နန်း
နို့ဟို ရှိမျှူလောင်းဟို သွန်သန်ပေးဟူကြောန်း ဖြစ်ဟယ်။
ဝိညာဉ်တော်ရဲ့ သွန်သန်ရှင်း ဂူလောင်းဟာ မှန်ကန်ဘီး လီ
ညာဟွားဇာ မေ့ဟု။ အယ်ကြောန် နန်းနို့ဟာ ဝိညာဉ်တော်
ဟု သွန်သန်ဟွားဟူတိုင်း လိုက်နာဘီး လောက်ဆောက်ဂေ့
ပါ။ ခရစ်တော်န တလောင်းတဝဒဲ ရှိဂေ့ပါ။

28 သားမီးလေ၊ ကိုယ်တော်ကြွလာဟူနေ့မှာ နို့လေဟာ
ရှစ်ကြော့-က်ရှင်းမွှေဘဲ ရှေ့တော်မှာ ရဲရဲရင့်ရင့်ဖြစ်ဟို

တွပ် ကိုယ်တော်န တလောင်းတဝဒဲ ရှိနေဂေ့ပါ။

²⁹ ဘုရားသခင်ဟာ ပြောန့်မတ်ဟယ် ဆိုဇာဟို နန်းနို့ သိဂေ့ဟယ်။ အယ်ကြောန့် ပြောန့်မတ်ရှင်းတရားဟို ကျင့်ဟူလူဟာ ဘုရားသခင်ရဲ့ သားမီးလေ ဖြစ်ဟူကြောင်းဟို နန်းနို့သိဂေ့ဟယ်။

3

ဘုရားသခင်ရဲ့ သားမီးလေကြောင်း

¹ နို့လေဟာ ဘုရားသခင်ရဲ့ သားမီးလေ ဆိုဘီး ခေါ်ခဲရဟူခွမ်ဟို ရဂေ့ဟူကြောန့် နို့လေဟို ဖဘုရားဟာ ဖယ်မျှလော့-က် ရှစ်နူးဆိုဟာ ဆင်ခြင်ဂေ့ပါ။ နို့လေဟာ တကယ်ဘဲ ဘုရားသခင်ရဲ့ သားမီးလေ ဖြစ်ဂေ့ဟယ်။ အယ်ကြောန့် အယ်လောကသားလေဟ နို့လေဟို သိဟ။ ဖဟိုလည်း သိဟ။

² ရှစ်ရဟူသူလေ၊ ခုဟ နို့လေဟာ ဘုရားသခင်ရဲ့ သားမီးလေ ဖြစ်ဂေ့ဟယ်။ နော့-က်မှ ဖယ်မျိုးဖြစ်မယ် ဆိုဇာသေးသေချားချာဟာ သိဟဘေမဲ့ ခရစ်တော်ကြွလာဟူ ခီမာ ကိုယ်တော်ဖြစ်နေတိုင်း ဖူးမြင်ရမယ် ဖြစ်ဟူကြောန့် နို့လေဟာ ကိုယ်တော်န တူဂေ့မယ် ဆိုဇာ သိရဂေ့ဟယ်။

³ ခရစ်တော်ဟို မှီပြုဘီး အယ်မျိုးမျှော်လင့်ဘီး တောန်းတလူဟာ ခရစ်တော်စင်ကြယ်မျိုးဘဲ ကိုယ့်ကိုယ်ကိုယ် စင်ကြယ်အောန် နေတတ်ဟယ်။

4 ပြစ်ဒုစရိုက်ကို လောက်ရှင်းဟာ ပညတ်တော်ဟို့ ခု
လိုးဖော့-က်ရှင်း ဖြစ်ဟူကြောန့် ပြစ်လွန်ကျူလူ မှန်မျှဟာ
ပညတ်တရားဟို့ ခုလိုးဖော့-က်ဟူလူ ဖြစ်ဟယ်။

5 ကိုယ်တော်ဟာ ပြစ်ဟို့ယူဆောန်ဟားဟို့တွပ် ပေါ်လာ
ဟူကြောန့်ဟို့ နန်းနို့သိဂေဟယ်။ ကိုယ်တော်နှိုက် ပြစ် မေ့
ဟို့။

6 ကိုယ်တော်န တလောင်းတဝဒဲ တည်နေဟူ လူတိုင်း
ဟာ ပြစ်လောက်တတ်ဟူ။ ပြစ်လောက်နေဟူ လူတိုင်းဟာ
ကိုယ်တော်ဟို့ သိမြင်သေးဟူ။

7 သားမီးလေ၊ ဖယ်သူလည်း နန်းနို့ဟို့ လှည့်ဇားစေန။
ခရစ်တော်ဟာ ဖြောန့်မတ်ဟူမျိုးဘဲ ဖြောန့်မတ်ရှင်းတရား
ဟို့ ကျင့်သောင်းဟူ လူဟာ ဖြောန့်မတ်ဟူလူ ဖြစ်ဟယ်။

8 ပြစ်လောက်ဟူလူဟာ မာရ်နတ်န ဆိုင်ဟူလူ ဖြစ်ဟု
ယ်။ ဖြားဖြစ်ကြောန့်နူးဆိုဟာ မာရ်နတ်ဟာ စစဒူးဟု
ပြစ်လွန်ကျူဟူသူ ဖြစ်ဟယ်။ ဘုရားသခင်ရဲ့ သားတော်
ပေါ်လာရှင်းဟု မာရ်နတ်လောက်ဟားဟူ မူလေဟို့ ဖျစ်ပ
စ်ဟို့တွပ် ဖြစ်ဟယ်။

9 ဘုရားသခင်ဟုနေ မွီးလာဟူ သားမီးလေဖြစ်ဟူကြော
န့် ပြစ်လောက်တတ်ဟူ။ ဖြားဖြစ်ကြောန့်နူးဆိုဟာ သူမာ
ဘုရားသခင်ရဲ့ ဇာတိသဘောလေ ပါနေဟူကြောန့် ဖြစ်ဟု
ယ်။ သူဟာ ဘုရားသခင်ဟုနေ ပေါ့-က်လာဟူ သားမီး
လေဖြစ်ဟူကြောန့် ပြစ်ဟို့လောက်နိုင်ဟူ။

10 အယ် မျိုး လတ် ခ ဇာတ် ဟို့ ကေ့ မယ် ဆို ဟာ

ဘုရားသခင်ရဲ့ သားမီးလေန မာရ်နတ်ရဲ့ သားမီးဟာ ကွာခြားရှင်းဟို့ သိရဟယ်။ ဖြောင့်မတ်ရှင်းတရားဟို့ ကျင့်ဘဲဟူလူ၊ ကိုယ့်ရဲ့ ညီကို မောန်နှမလေဟို့ ရှစ်ဘဲဟူလူဟာ ဘုရားသခင်ရဲ့ သားမီး မူဟု။

ရှင်းရှင်းရှစ်ဂေပါ

¹¹ နို့လေဟာ ရှင်းရှင်းရှစ်ရမယ် ဆိုဟားဟူ တရားတော်ဟို့ စစဒူးဟု နန်းနို့ဟာ ကြားရဟူ ဒန်းစကားဖြစ်ဟယ်။

¹² မာရ်နတ်နဆိုင်ဟူ သူညီ အားဗေလဟို့ သတ်ဟူ ကာကုန်မျိုး ဖြစ်ဂေ။ ကာကုန်ဟာ သူညီဟို့ ဖြားဖြစ်ကြောန် သတ်နူး။ သူ့ကျင့်ဟု ကောင်းဘဲဟူကြောန် သူ့ညီကျင့်ဟု ဖြောင့်မတ်ဟူကြောန် ဖြစ်ဟယ်။

¹³ အယ်ကြောန် ညီကို မောန်နှမလေ၊ လောကသားလေဟု နန်းနို့ဟို့ မူးဂေဟူ ခီမာ အံ့ဩဂေ။

¹⁴ နို့လေဟာ ကိုယ့်ရဲ့ ညီကို မောန်နှမလေဟို့ ရှစ်ဂေဟူကြောန် သေရှင်းဟုနေ သတ်ရှင်ဟူနေရာဟို့ ကူးရဂေကြောန်းဟို့ နို့လေဟု သိဂေဟယ်။ ကိုယ့်ရဲ့ ညီကို မောန်နှမလေဟို့ ရှစ်ဘဲဟူလူဟာ သေနေဟူ ဘဝမာဘဲ ရှိနေသေးဟယ်။

¹⁵ ကိုယ့်ရဲ့ ညီကို မောန်နှမဟို့ မူးနေဟူလူဟာ လူသတ်မားဖြစ်ဟယ်။ လူသတ်မားဟာ ထာဝရသတ်ဟို့ ရဘဲကြောန်းဟို့ သိဂေဟယ်။

16 ခရစ်တော်ဟာ နို့လေတွပ် သတ်စွန့်ဟူ မြစ်တာကြော
န်းဟို့ နို့လေဟာ သိဂေဟယ်။ နို့လေဟလည်း ကိုယ့်ရဲ့ ညီ
ကို မောန်နှမလေတွပ် သတ်ဟို့ စွန့်ရဂေဟယ်။

17 လောကီစည်းငိမ် အောက်စလေ ကြွယ်ဝဟူလူဖြစ်
ဘီး ကိုယ့်ရဲ့ ညီကို ယော့-က်ယော့-က်ဟု ဆင်းရဲရှင်းဟို့
မြင်ဟူ ခီမာ သနားကြင်နာမှု မေ့ဘဲနေဆိုဟာ ဖယ်မျိုး
ဘုရားသခင်ရဲ့ မြစ်တာတော်ဟု ရှိနိုင်ဟို့နူး။

18 သားမီးလေ၊ နို့လေရဲ့ မြစ်တာဟာ နှောက်ဖြားမာဘဲ
ရှိဟူ ရှစ်ရှင်းမြစ်တာမျိုး ဖြစ်သင့်ဟု။ လတ်တို့ ဖော်ပြရ
ဟူ မြစ်တာစစ်မြစ်တာမှန် ဖြစ်ရမယ်။

ဘုရားသခင်ရှေ့မာ ရဲရင့်ဟူခွဲမ့်

19 အယ်မျိုးနည်းအားဖြင့် နို့လေဟာ သမ္မာတရားနဆိုင်
ဟူ လူဖြစ်ဟူကြောင်းဟို့ သိနိုင်ဟယ်။ ဘုရားသခင်ရဲ့ ရှေ့
မာလည်း ကိုယ့်ရဲ့ စိန်လောင်းဟု သတ်သာဂေလေ့မယ်။

20 နန်စိန်လောင်းဟု နန့်ဟို့ ပြစ်တန်ခံရဟူ ခီမာ ဘုရား
သခင်ဟာ နို့လေရဲ့ စိန်လောင်းထတ် ကီးမြတ်ကြောင်း၊
ကိုယ်တော်ဟာ မူရှိမျှဂလောင်းဟို့ သိကြောင်းဟို့ နို့လေ
ဟု သိဂေဟယ်။

21 အယ်ကြောန့် ရှစ်ရဟူသူလေ၊ နို့လေရဲ့ စိန်လော
င်းဟု နို့လေဟို့ ပြစ်တန်ဘဲန နေမယ် ဆိုဟာ နို့လေဟာ
ဘုရားသခင်ရှေ့မာ ရဲရင့်ဟူခွဲမ့်ဟို့ ရဂေဟယ်။

22 နို့လေဟာ ကိုယ်တော်ရဲ့ ပညတ်တော်ဟို့ စောန့်ဟူ
လူလေ၊ ကိုယ်တော် နှစ်သက်ဟူမူလေဟို့ လောက်ဟူလူ

လေ ဖြစ်ဟူကြောင့် နို့လေ တောန်းရှော-က်ရှင်း မှန်မျှဟာ ဘုရားသခင်နားဟု ရဂေဟယ်။

²³ ကိုယ်တော် ရဲ့ ပညတ် တော် ဟု နို့ လေ ဟာ ဘုရားသခင်ရဲ့ သားတော် ယေရှုခရစ်ရဲ့ နာမတော်ဟို့ ယောင်ကြည်ရမယ်။ အယ်သခင် ပြောဟူးဟူတိုင်းဘဲ ရှင်းရှင်း တယော့-က်ဟို့ယော့-က် ရှစ်ရမယ် ဆိုဘီး ပြော ဟူးဟယ်။

²⁴ ဘုရားသခင်ရဲ့ ပညတ်တော်လေဟို့ စောင့်ဟူလူဟာ ဘုရားသခင်နု တလောင်းတဝဒဲဖြစ်ဘီး ဘုရားသခင်ဟု လည်း အယ်လူနု တလောင်းတဝဒဲ ဖြစ်ဟယ်။ အယ်မျိုး ဖြစ်ဟူကြောန်းဟို့ ကိုယ်တော်ပေးဟူးဟူ ဝိညာဉ်တော် ကြောင့် နို့လေ သိဂေဟယ်။

4

သမ္မာတရားဝိညာဉ်တော်နု မိဆာဝိညာဉ်

¹ ရှစ်ရဟူသူလေ၊ ရရာတိုင်းများဟူ ပရောဖက်တုယော န်လေဟာ အယ်လောကမာ ပေါ်လာဂေဘီ ဖြစ်ဟူကြော နို့ ဝိညာဉ်တိုင်းဟို့ ယောင်ကြည်ဘဲနု အယ်ဝိညာဉ်လေဟာ ဘုရားသခင်နု ဆိုင်လား၊ ဆိုင်ဟုလား ဆိုဇာ စစ်ဆေးဂေ ပါ။

² ဘုရားသခင်ရဲ့ ဝိညာဉ်တော်ဟောက်လော၊ ဟောက် ဟုလော၊ ဆိုဇာ နန်းနို့ဟာ အယ်မျိုးနည်းအားဖြင့် သိနိုင် ဟယ်။ သခင်ယေရှုခရစ်ဟာ လူဇာတိခံယူဘီးဟာ ကြွလာ

ဟယ် ဆိုဇာဟို ဝန်ခံဟူလူဟာ ဘုရားသခင်နားဟုနေ ကြွ
လာဟူ ဝိညာဉ်တော်ဟို ခံရဟူလူ ဖြစ်ဟယ်။

³ လူဇာတိအားဖြင့် ကြွလာဟူ ယေရှုခရစ်ဟို ဝန်ခံဘဲဟူ
လူဟာ ဘုရားသခင်နားဟု ကြွလာဟူ ဝိညာဉ်တော်ဟို ခံရ
ဟူးဟူလူ မှဟု။ အယ်လူထဲမာ ကိန်းဝပ်နေဟူဝိညာဉ်ဟာ
ခရစ်တော်ရဲ့ ရန်သူဖြစ်ဟယ်။ ခရစ်တော်ရဲ့ရန်သူ ဝိညာ
ဉ်ဟာ အယ်လောကဟို ရှေး-က်လာဟိုကြောင်းဟို နန်းနို့
ဟာ ကြားရဟူးဘီး ဖြစ်ဟူကြောနဲ့ သူဟာ ခုဘဲ ရှေး-က်
လာနေဘီ ဖြစ်ဟယ်။

⁴ သားမီးလေ၊ နန်းနို့ဟာ ဘုရားသခင်န ဆိုင်ဂေဟူကြော
နဲ့ အယ်လူလေဟိုလည်း အောန်ဂေဟယ်။ ဖြားဖြစ်ကြော
နဲ့ဆိုဟာ နန်းနို့ဖတ်မာ ရှိနေဟူသူဟာ လောကဖတ်မာ ရှိ
နေဟူလူထတ် ပိုဘီး ဟာ အားကီးဟယ်။

⁵ အယ်လူလေဟာ လောကနဆိုင်ဟူ လူလေဖြစ်ဂေဟ
ယ်။ အယ်ကြောနဲ့ လောကရဲ့ ကြောန်းရာလေဟိုဘဲ ပြော
ဂေဟယ်။ လောကသားလေဟုလည်း သူးနို့စကားဟိုဘဲ
နားထောန်ဂေဟယ်။

⁶ နို့လေဟု ဘုရားသခင်န ဆိုင်ဟယ်။ ဘုရားသခင်ဟို
သိဟူလူဟာ နို့လေရဲ့ စကားဟို နားထောန်တတ်ဟယ်။
ဘုရားသခင်န ဆိုင်ဘဲဟူလူဟာ နို့လေရဲ့ စကားဟို နား
ထောန်တတ်ဟု။ အယ်ကြောနဲ့ သမ္မာတရားဝိညာဉ်န မိဆာ
ဝိညာဉ်ဟို ပိုင်းခြားဘီး သိဂေဟယ်။

ဘုရားသခင်ဟာ ရှစ်ရှင်းမြစ်တာဖြစ်ကြောင်း

⁷ ရှစ်ရဟူသလေ၊ နို့လေဟာ ရှင်းရှင်းရှစ်ဂေဇို။ ဖြားဖြစ်ကြော့နဲ့နဲ့ဆိုဟာ ရှစ်ရှင်းမြစ်တာဟာ ဘုရားသခင်နဲ့ ဆိုင်ဟူကြော့နဲ့ ရှစ်တတ်ဟူလူဟာ ဘုရားသခင်ဟုနေ ပေါ့-က်လာဟူ သားမီးလေဖြစ်ဟယ်။ ဘုရားသခင်ဟိုသိဟူ လူလည်းဖြစ်ဟယ်။

⁸ ရှစ်ရှင်းမြစ်တာ မေ့ဘဲဟူလူဟာ ဘုရားသခင်ဟို သိဟူ။ ဖြားဖြစ်ကြော့နဲ့နဲ့ဆိုဟာ ဘုရားသခင်ဟာ ရှစ်ရှင်းမြစ်တာဖြစ်တော်မူဟယ်။

⁹ နို့လေဟာ သားတော်အားဖြင့် သတ်ရှင်ဟို့တွပ် ဘုရားသခင်ဟာ သူ့ရဲ့ တပါးဒဲဖြစ်ဟူ သားတော်ဟို့ အယ်လောကဟို့ စေလွှတ်လိုက်ဇာဟာ နို့လေဟို့ ရရာတိုင်းရှစ်ဟူ မြစ်တာတော်ဟာ ထန်ရှားနေဟယ်။

¹⁰ နို့လေဟာ ဘုရားသခင်ဟိုရှစ်ဇာ မူဟူ။ ဘုရားသခင်ဟာ နို့လေဟို့ ရှစ်ဘီးဟာ နို့လေဟာ ပြစ်ဖြေလွှတ်ခံရဘီး ပူဇော်ဆစ်ကပ်ဟူဖြစ်နဲ့ သူ့ရဲ့ သားတော်ဟို့ စေလွှတ်လိုက်ဇာမာ ရှစ်ရှင်းမြစ်တာရှိဟယ်။

¹¹ ရှစ်ရဟူသလေ၊ ဘုရားသခင်ဟာ နို့လေဟို့ အယ်မျှလော့-က်ရှစ်ဟယ် ဆိုဇာဟို့ မှန်ဟယ် ဆိုဟာ နို့လေဟူလည်း ရှင်းရှင်းရှစ်ရမယ်။

¹² ဘုရားသခင်ဟို့ ဖယ်သူလည်း ဗြင်ရဘေမဲ့ နို့လေဟာ ရှင်းရှင်းရှစ်မယ် ဆိုဟာ ဘုရားသခင်ဟာ နို့လေမာတည်နေဘီး ဘုရားသခင်ရဲ့ ရှစ်ရှင်းမြစ်တာဟာ နို့လေမာလည်း

ပုလဲဇောင်လေဟယ်။

13 ဘုရားသခင်ဟာ သူ့ရဲ့ ဝိညာဉ်တော်ဟို့ နို့လေဟို့ ပေး
ဟူကြောန့် နို့လေဟာ ဘုရားသခင်မာတည်ဘီး ဘုရားသ
ခင်ဟုလည်း နို့လေမာ တည်နေဟူကြောန်းဟို့ နို့လေ သိ
ဂေဟယ်။

14 ဖဟာ သားတော်ဟို့ လောကရဲ့ ကယ်တန်ရှင်နေန
လွတ်လိုက်ဇာဟို့ နို့လေဟာ မြင်ဘီး သတ်သေခံဂေဟယ်။

15 ဖယ်သူမဆို ယေရှုဟာ ဘုရားသခင်ရဲ့ သားတော် ဖြ
စ်ဟူကြောန်းဟို့ ဝန်ခံမယ် ဆိုဟာ ဘုရားသခင်ဟာ အယ်
လူမာတည်ဘီး အယ်လူဟုလည်း ဘုရားသခင်မာ တည်
နေဟယ်။

16 နို့လေမာ ဘုရားသခင်ထားဟားဟူ ရှစ်ရှင်းမြစ်တာ
ဟို့သိဘီး ယောင်ကြည်ဂေဟယ်။ ဘုရားသခင်ဟာ ရှစ်
ရှင်းမြစ်တာဖြစ်တော်မူဟယ်။ ရှစ်ရှင်းမြစ်တာနှိုက် ရှိဟူ
လူဟာ ဘုရားသခင်နှိုက်ရှိဟယ်။ ဘုရားသခင်ဟာလည်း
အယ်လူနှိုက်ရှိတော်မူဟယ်။

17 နို့လေမာ ကိုယ်တော်ရဲ့ မြစ်တာဟာ ပုလဲ ဝ
စောင်လင်ဟူကြောန့် တရားစီရင်ဟူနေမာ နို့လေဟာ
ရဲရင့်တည်ကြည်ဇာဟို့ ရဂေလေ့မယ်။ ဖြားဖြစ်ကြောန့်နူး
ဆိုဟာ လောကမာ နို့လေဟာ ခရစ်တော်မျိုးဘွဲ့ သတ်ရှင်
ဂေကြောန့်ဖြစ်ဟယ်။

18 ရှစ်ရှင်းမြစ်တာမာ ကြော့-က်စိ မေ့ဟု။ ပုလဲဝစောင်
လင်ဟူ မြစ်တာဟာ ကြော့-က်စိဟို့ ဖယ်ရှားပေးဟယ်။

ကြော့-က်စိဟာ ပြစ်ဒန်ခံရဇာဟို စောန်မျှော်တတ်ဟူ
 ကြော့နဲ့ ကြော့-က်စိရှိဟူသူမာ မြစ်တာနပုလဲဇောင်ဇာ မွေ
 ဟူ။

19 ဘုရားသခင်ဟာ နို့လေဟို ရင်ဦးဆောင်း ရှစ်ဟူ
 ကြော့နဲ့ နို့လေဟာ ကိုယ်တော်ဟို ရှစ်ဂေဟယ်။

20 ဘုရားသခင်ဟို ရှစ်ဟယ် ဆိုဘီး ညီကိုဟို မူးနေဟူ
 လူဟာ လီညာဟူလူ ဖြစ်ဟယ်။ ဖြားဖြစ်ကြော့နဲ့ဆိုဟာ
 မျစ်စိန် မြင်ရဟူ ညီကိုဟို ရှစ်နိုင်ဘဲဟူလူဟာ မျစ်စိန် မြင်
 ရဘဲဟူ ဘုရားသခင်ဟို ဖယ်မျိုးရှစ်နိုင်ဟိုနူး။

21 ဘုရားသခင်ဟို ရှစ်ဟူလူဟာ ကိုယ့်ရဲ့ ညီကိုဟို ရှစ်
 ရမယ် ဆိုဘီး ပညတ်တော်ဟို နို့လေဟာ ခရစ်တော်နားဟု
 ခံရဂေဟယ်။

5

လောကဟို အောန်ဟူကြော့နဲ့

1 ယေရှုဟာ ခရစ်တော်ဖြစ်ဟယ် ဆိုဇာဟို ယောင်ကြ
 ည်ဟူလူဟာ ဘုရားသခင်ဟုနေ ပေါ့-က်လာဟူ သားမီး
 လေဘဲ ဖြစ်ဟယ်။ ဖဟို ရှစ်ဟူလူဟာ သားဟိုလည်း ရှစ်
 တတ်ဟယ်။

2 နို့လေဟာ ဘုရားသခင်ဟို ရှစ်ဘီး ဘုရားသခင်ရဲ့
 ပညတ်တော်လေဟို လိုက်နာဘီးကျင့်မယ် ဆိုဟာ အယ်
 မူရာလေအားဖြင့် နို့လေဟာ ဘုရားသခင်ရဲ့ သားမီးလေ
 ဟို ရှစ်ကြော့နဲ့ဟို နို့လေ သိဂေဟယ်။

3 ဘုရားသခင်ဟို့ ရှစ်ဟယ် ဆိုဇာဟာ ဘုရားသခင်
ရဲ့ ပညတ်တော်လေဟို့ လိုက်ရှော့-က်ရှင်းဘဲ ဖြစ်ဟယ်။
ဘုရားသခင်ရဲ့ ပညတ်တော်လေဟို့ လိုက်ရှော့-က်ရှင်း
ဟာ ခတ်ခဲဇာ မူဟု။

4 ဖြားဖြစ်ကြောန်နူးဆိုဟာ ဘုရားသခင်ဟုနေ ပေါ့-က်
လာဟူ သားမီးလေဟာ လောကဟို့ အောန်နိုင်ဂေဟယ်။
နို့လေရဲ့ ယောင်ကြည်ရှင်းကြောန် လောကဟို့ အောန်ဂေ
ဟယ်။

5 သခင်ယေရှုဟာ ဘုရားသခင်ရဲ့ သားတော်ဖြစ်ဟယ်
ဆိုဇာဟို့ ယောင်ကြည်ဟူသူမှ တပါး ဖယ်သူဟု လောက
ဟို့ အောန်နိုင်နူး။

သခင်ယေရှုကြောန် သတ်သေခံကြောန်

6 ယေရှုခရစ်ဟာ ရေအားဖြင့် ဗတုတိဇ်ဟို့ခံဘီး၊ သွီး
တော်ဟို့ သွန်းဘီး၊ သေခံဘီး ကြွလာဟူသခင် ဖြစ်ဟု
ယ်။ ကိုယ်တော်ဟာ ရေအားဖြင့်ဘဲ ကြွလာရှင်း မူဟု။ ရေ
နရော၊ သွီးနရော ကြွလာဟယ်။ ဝိညာဉ်တော်ဟာ သမ္မာ
တရားဖြစ်ဘီး ကြွလာဟူကြောန်ဟို့ သတ်သေခံဟယ်။

7 သတ်သေခံ သောင်းပါး ရှိလေဟယ်။

8 အယ်သောင်းပါးဟာ ဝိညာဉ်တော်၊ ရေ၊ သွီးလေဖြစ်
ဂေဘီး အယ်သောင်းပါးဟာ တလောင်းတဝဒဲ ဖြစ်ဂေဟု
ယ်။

9 နို့လေဟာ လူလေရဲ့ သတ်သေခံဇာတို့ လတ်ခံတတ်
 ဂေဟယ်။ ဘုရားသခင်ရဲ့ သတ်သေခံချစ်ဟာ လူလေရဲ့
 သတ်သေခံချစ်ထက် ပိုဘီး ဟာ ခိုင်လောင်ဟယ်။ ဘုရား
 သခင်ဟုလည်း သားတော်ကြောန်းတို့ သတ်သေခံရှင်း ဖြစ်
 ဟယ်။

10 ဘုရားသခင်ရဲ့ သားတော်တို့ ယောင်ကြည်လူဟာ
 အယ်သတ်သေခံချစ်တို့ စိန်လောင်းထဲမှာ ရဟားဟယ်။
 ဘုရားသခင်တို့ ယောင်ကြည်ဘဲဟူ လူဟာ ဘုရားသခင်
 တို့ မုသားသောင်းဘီး ပြစ်တန်ဟယ်။ ဖြားဖြစ်ကြောန့်
 နှူးဆိုဟာ ဘုရားသခင်ဟာ သူ့ရဲ့ သားတော်နု ပတ်သတ်
 ဘီး သတ်သေခံရှင်းလေတို့ အယ်လူဟာ ယောင်ကြည်ဘဲ
 ကြောန့် ဖြစ်ဟယ်။

11 အယ်သတ်သေခံချစ်ဟု ဘုရားသခင်ဟာ နို့လေတို့
 ထာဝရသတ်တို့ပေးဘီး အယ်သတ်ဟာ သားတော်မပါ
 ဟယ်။

12 သားတော် တို့ ရဟူလူဟာ သတ်တို့ရဟယ်။
 ဘုရားသခင်ရဲ့ သားတော်တို့ ရဘဲဟူလူဟာ သတ်တို့ရ
 ဟယ်။

ထာဝရသတ်ကြောန်း

13 ဘုရားသခင်သားတော်ရဲ့ နာမတော်တို့ ယောင်ကြည်
 ဟူ နန်းနို့ဟာ ထာဝရသတ်တို့ ကိုယ်တိုင်ရဟယ် ဆိုဇာတို့

သိစေဟို့တွပ် အယ်ဇာလေဟို့ နန်းနို့လေဟို့ ငါရေးပေးလိုက်ဟယ်။

14 ဘုရားသခင်မာ နို့လေထားဟူးဟူ ယောင်ကြည်စိခလမှုဟာ နို့လေဟာ လိုတော်နညီဟူဇာ တခုခုဟို့ တောန်းမယ် ဆိုဟာ ဘုရားသခင်ဟာ နားထောန်လေ့မယ်။

15 နို့လေ ဆုတောင်းဇာမှန်မျှဟို့ နားထောန်ဟယ် ဆိုဘီး နို့လေသိဟယ် ဆိုဟာ ဘုရားသခင်နားဟု တောန်းလျှော့-က်ဇာလေဟို့ နို့လေရပီးဘိ ဆိုဇာဟို့ နို့လေ သိဂေဟယ်။

16 ညီကိုတယော့-က်ဟာ သတ်ဝိညာဉ် ဆောင်းရှောင်းရှင်းဟုလွဲဘီး တခြားပြစ် တခုခုဟို့ လွန်ကျူးမယ် ဆိုဟာ သူ့တွပ်ဘုရားသခင်မာ တောန်းလျှော့-က်လိုက်။ ကိုယ်တော်ဟာ သူ့ဟို့ သတ်ပေးလေ့မယ်။ အယ်ဘေမဲ့ သတ်ဝိညာဉ်ဆောင်းရှောင်းဟူ ပြစ်ဆိုဇာရှိဟယ်။ အယ်ပြစ်မျိုးဟို့ လွန်ကျူးဟူ လူလေတွပ် ဆုတောင်းရမယ် ဆိုဘီး ငါဆိုလိုဟူ။

17 ဒုစရိုက်မှန်မျှဟာ ပြစ်ဖြစ်ဟယ်။ အယ်ဘေမဲ့ သတ်ဝိညာဉ်ဟို့ ဆောင်းရှောင်းနိုင်ဘဲဟူ ပြစ်လည်းရှိဟယ်။

18 ဘုရားသခင်ဟုနေ ပေါ့-က်လာဟူ သားမီးလေ ဖြစ်ဟူကြောန် ပြစ်လောက်တတ်ဘဲဟူကြောန်းဟို့ နို့လေသိဂေဟယ်။ သူ့ဟို့ ဘုရားသခင်ဟု စောန်ထီးပေးဟူကြောန် မာရ်နတ်ဟာ အယ်လူဟို့ ထိခိုက်နိုင်ဟူ။

19 ကမ္ဘာလောက တခုလောင်းဟာ မာရ်နတ်ရဲ့တဂိုးလေ

လွှမ်းမိုးဟူးကြောနဲ့ နို့လေဟာ ဘုရားသခင်နဲ့ ဆိုင်ဟူ
ကြောန်းဟို့ နို့လေဟာ သိဂေဟယ်။

²⁰ ဘုရားသခင်ရဲ့ သားတော်ဟာ လောကဟို့ ကြွလာ
ဘီးဟာ နို့လေဟို့ ဘုရားစစ်ဘုရားမှန်ဟို့ သိနိုင်ဟူဉာ
ဏ်ဟို့ ပေးဟူကြောနဲ့ နို့လေဟာ သိရဟယ်။ နို့လေဟာ
ဘုရားသခင်ရဲ့ သားတော် ယေရှုခရစ်နရော၊ ဘုရားစစ်
ဘုရားမှန်ဖြစ်ဟူ ဘုရားသခင်နရော၊ တလောင်းတဝဒဲ ရှိ
ဂေဟယ်။ ကိုယ်တော်ဟာ ဘုရားစစ်ဘုရားမှန် ဖြစ်ဟယ်။
ထာဝရသတ်လည်း ဖြစ်ဟယ်။

²¹ သားမီးလေ၊ နန်းနို့ဟာ ဘုရားတုယောန်လေဟို့ ရှော
န်ဂေပါ! ယောဟန်ရဲ့ ပေးစာပီးဘီ။

ဓမ္မသစ်ကျမ်း ထားဝယ်ဘာသာစကား
The Holy Bible in the Tavoyan language of
Myanmar: ဓမ္မသစ်ကျမ်း ထားဝယ်ဘာသာစကား

copyright © 2024 The Word for the World International

Language: (Tavoyan)

Contributor: The Word for the World International

ထားဝယ် ဓမ္မသစ်ကျမ်း

The New Testament in Dawei Language

The Word for the World

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 9 Jul 2025 from source files dated 9 Jul 2025

0c63f106-1001-58e4-ad11-6f62c327c4e1